
Жаҳон кубоги мусобақалари совриндори муносиб тақдирланди

Жорий йилнинг 6-8 октябрь кунлари Тошкент шаҳрида ИТКФ каратэ-до бўйича жаҳон кубоги мусобақалари ўтказилди.

“Юнусобод” спорт мажмуасида ташкил этилган, мазкур турнирда 20 дан ортиқ мамлакатдан 800 га яқин иштирокчи ғолиблик учун баҳс олиб боришди. Усмир-ёшлар ва катталар ўртасида бўлиб ўтган жаҳон кубогида қатнашувчилар ката, жамоавий ката, кумитэ ва НБУ йўналишларида баҳс олиб боришди. Яқунда, умумжамоа ҳисобида Ўзбекистон терма жамоаси 1-ўринни қўлга киритди. Қувонарлиси, Учкўприк туманидаги 17-умумтаълим мактаби ўқувчиси Абдурахмон Абдурашидов ҳам мазкур мусобақада муносиб иштирок этиб, фахрли иккинчи ўринни эгаллади ва кумуш медаль соҳибига айланди.

Бугун 17-умумтаълим мактабида ёш спортчини тантанали кутиб олиш ва тақдирлаш маросими ўтказилди. Тантанали маросимда туман ҳокимлиги масъуллари, спортчининг устоз-мураббийлари ва ота-онаси, жамоатчилик вакиллари иштирок этди.

Туман ҳокими ўринбосари Шухратжон Позилов ёш спортчини эришган муваффақияти билан қутлаб, унинг бу ютуғи тенгдошлари учун ўрнак бўлишини, унга ҳавас қилган яна кўплаб туманимиз ёшлари спорт соҳасида янги марраларни забт этишга интилишини таъкидлади. Тадбирда ёш спортчи эришган муваффақиятлар алоҳида эътироф этилиб, у ва унинг мураббийлари ҳамда устозлари туман ҳокимлигининг ташаккурномалари ҳамда эсдалик совғалари билан тақдирланди.

2023-10-11 10:07:39